



Skýrsla æskulýðsnefndar Blæs 2014-2015



Í æskulýðsnefnd 2014-2015 sátu Þórhalla Ágústsdóttir æskulýðsfulltrúi, Rósa Dögg Þórsdóttir, Anna Bergljót Sigurðardóttir, Guðrún Smáradóttir, Jón Björn Hákonarson, Laufey Sigurðardóttir og María Katrín Jónsdóttir.

Í Blæ er lögð áhersla á að halda uppi virku og öflugu æskulýðsstarfi enda er það grunnurinn að framtíð félagsins. Reynt er að hafa sem flesta viðburði á vegum félagsins við hæfi allra aldurshópa og brúa kynslóðabilið sem víðast. Þannig eru félagsreiðtúrar t.d. miðaðir við að krakkar geti tekið þátt í þeim og hestaferð félagsins er við hæfi allra sem orðnir eru þokkalega hestfærir. Félagsaðstaðan okkar er að verða afar góð og býður upp á stórbætta möguleika til æskulýðsstarfs.

Æskulýðsstarfið hófst í desember þar sem krakkarnir hittust og spjölluðu um vetrarstarfið og höfðu svo kósí með popp og hestamynd.

Í janúar hófust aldursskiptar samverustundir sem voru reglulega á dagskrá í vetur. Skipt var í eldri og yngri hóp og ýmislegt skemmtilegt brasað inni í Dalahöll, fræðslukvöld, gistigleði, fílaþótbolti og pizzukvöld voru meðal þess sem var á dagskrá.

Reiðnámskeið var á dagskrá vetrarins þar sem Reynir Atli Jónsson kenndi í helgarlotum. Krakkarnir voru duglegir í fjáröflunum á árinu og fengu því talsvert niðurgreitt á námskeiðið. Þátttaka var góð og höfðu allir gagn og gaman af.

Æskulýðsdagar voru haldnir 12.-14. júní á félagssvæði Blæs þó heldur voraði seint hjá okkur. Æskulýðsdagar hafa nokkuð lengi verið árviss atburður í félaginu og á undanförunum árum hefur þátttakan verið jöfn og góð. Í ár tóku 30 krakkar á aldrinum 4-17 ára þátt í æskulýðsdögum. Okkar ágæti Reynir Atli Jónsson var reiðkennari þetta árið og fórst það mjög vel úr hendi. Þó hestamennska og fræðsla tengd henni sé í fyrirrúmi á þessum dögum þá er ýmislegt fleira sér til gamans gert s.s. farið í sundferðir, leiki, sungið, haldnar kvöldvökur, farið í gönguferðir, óvissuferðir og grillað. Listasmiðjur voru alla dagana þar sem unnið var við skeifulist, myndlist og fleira, ungmenni úr leikfélaginu unnu með krökkunum að skemmtiatriðum fyrir kvöldvöku og hestasnyrting og reiðtygjaumhirða var á sínum stað. Síðasta daginn var slegið upp skrautsýningu þar sem stoltir knapar léku listir sínar og sýndu árangur námskeiðsins. Allir voru velkomnir á sýninguna sem var vel sótt og endaði með grillveislu. Æskulýðsnefndin og félagar úr Blæ vinna mikla sjálfböðavinnu á æskulýðsdögum, t.d. þarf að sjá um matinn, vera með í reiðtúrum og gæta krakkanna á nóttunni, flytja þá í sund og á aðra viðburði sem fram fara utan hestasvæðis, auk þess að sjá um allan undirbúning. Krakkarnir dvelja á félagssvæðinu meðan á æskulýðsdögum standur, í tjöldum ef veður leyfir en annars í félagshúsi Blæs. Öllum krökkum sem geta útvegað sér reiðskjóta er heimil þátttaka á æskulýðsdögum og þátttökugjald er ekkert. Hluti hópsins núna var að stíga sína allra fyrstu skref í hestamenskunni en aðrir voru lengra komnir. Það er alltaf ótrúlega gaman að fylgjast með framförunum sem verða hjá krökkunum á æskulýðsdögum þar sem þau eru allan daginn í reiðtímum, reiðtúrum og hópastarfi tengdu hestum og þar kviknar áhugi hjá mörgum sem annars fengu ef til vill ekki tækifæri til að kynnast hestamennsku.



Börn, unglingar og ungmenni settu á starfsárinu svip sinn á mót sem haldin voru á vegum félagsins með þátttöku sinni og sóttu einnig mót í nágrennabyggðum eins og ístölt Austurlands og fleira. Auk þess var fjórðungsmót á Austurlandi þar sem Blær átti fulltrúa í barna og unglingaflokki sem stóðu sig með miklum sóma og náðu góðum árangri.

Að þessu sinni var fjórðungur þátttakenda í haustferð Blæs um nálæga eyðifirði úr æskulýðsdeildinni;)

Til starfsins þetta árið naut æskulýðsdeildin góðra styrkja, til dæmis frá SÚN og Spretti en auk þess var deildin með eigin fjáraflanir sem gengu vel, t.d. sölu á jólamarkaði Dalahallarinnar, sölu á bláu fjöðrinni og fleira.

Í æskulýðsstarfinu er oft erfitt að finna góðan tíma til samverustunda og námskeiðahalds vegna þess hversu upptekið unga fólkið er í öðrum íþróttum. Við reynum þó að finna út hvað hentar hverju sinni og leitumst við að styðja sem best við bakið á þeim eru virkir auk þess að laða til okkar nýja áhugasama félaga sem geta haldið starfinu okkar gangandi.

Með bestu kveðju

Æskulýðsnefnd Blæs